

## Mál nr. 7/2010-2011

**Kærandi:** Baldur Sigurðsson

**Kærðu:** Vefmiðillinn pressan.is

**Kæruefni:** Umfjöllun um leigubílstjóra og sérstaka þjónustu hans

### Málsmeðferð:

Kæra barst siðanefnd með tölvubréfi, dags. 3. desember 2010 ásamt fylgigögnum. Málið var tekið fyrir á fundi siðanefndar 7. desember og ákveðið að óska eftir viðbrögðum kærða. Málið var síðan aftur tekið fyrir á fundum siðanefndar 21. desember og 4. janúar 2011.

### Málavextir:

Vefmiðillinn pressan.is birti frétt 12. nóvember/október?? um leigubílstjóra sem setti fram ákveðið tilboð á Facebook á ensku: *Topless men = no ride / Topless women = free ride*, með öðrum orðum því slegið upp að bílstjórinn byði stúlkum sem beruðu á sér brjóstin frítt far. Jafnframt var dregið fram í frétt vefmiðilsins að maðurinn hefði 12 árum fyrr verið dæmdur í Hæstarétti fyrir nauðgun. Einnig var staðhæft að hafin væri undirskriftasöfnun gegn manninum meðal bílstjóra á Hreyfli. Vefmiðillinn byggði fréttina á upplýsingum af Facebook-síðu mannsins og henni fylgdu einnig nokkur ummæli.

Í framhaldsfrétt sama dag var rætt við framkvæmdastjóra Hreyfils þar sem hann lýsti því að leigubílastöðin grafist ekki fyrir um fortíð bílstjóra, Vegagerðin gefi út leyfi standist menn ákveðnar kröfur. Í síðari frétt vefmiðilsins var notað orðið kynferðisafbrot eftir að maðurinn hafði kvartað við vefmiðilinn um notkun orðsins nauðgun.

Í kæru sinni telur bílstjórinn gögn af Facebook sem birtust á vefnum hafa verið skrumskæld, meðal annars ummæli sem hann hafi ekki viðhaft. Segir hann Pressuna birta fölsuð gögn og ritstjórinn neiti að taka þau út. „*Hann hefur breytt ýmsu eftir ábendingar frá mér en neitar að aðhafast nokkuð enn frekar. Þar með tekur hann og pressan.is virkan þátt í einelti gegn mér,*” segir hann í kærubréfi. Einnig að Pressan hafi haldið því fram að hann væri „*dæmdur nauðgari og hefur greinin verið notuð til eineltis gegn mér síðan þetta gerðist með því að er skrifað inn á samskiptasíður eins og barnaland.is og facebook.com svo eitthvað sé nefnt og sér ekki fyrir endann á því.*”

### Umfjöllun:

Pressan.is greinir í frétt sinni frá tilboði bílstjórans og vitnar þar til Facebook síðu mannsins „*þar sem hann hikaði ekki við að auglýsa tilboð sitt, það er að þær konur sem fari úr að ofan fái frítt far. Karlmennt sem fara úr að ofan fá hins vegar ekki far. Facebook síðunni hefur verið lokað, en Pressan hefur undir höndum skjáskot af síðunni sem tekin voru áður en hún lokaði,*” segir í fréttinni og eru nokkrar færslur tilgreindar. Þá er rifjað upp að maðurinn hafi hlotið dóm fyrir kynferðisbrot


Í greinargerð frá ritstjóra Pressunnar segir að auglýsingar leigubílstjórans af þessum toga væru fréttæmar „*jafnvel þótt hann hefði ekki hlotið fangelsisdóm fyrir kynferðisbrot,*” og að ekki þurfi að rökstyðja fréttamatið frekar.


Taka má undir það sjónarmið að óvenjuleg auglýsing eða tilboð bílstjórans sé fréttæm eins og hún var sett fram á Facebook enda vart ljóst hvort um gaman eða alvöru er að ræða. Ekki er heldur gerð athugasemd við að vegna eðlis tilboðsins skuli það sett í samhengi að umræddur bílstjóri hafi verið dæmdur fyrir kynferðisbrot. Siðanefnd getur ekki tekið afstöðu til þess hvort gögn sem birtust á Facebook hafi verið fölsuð eða skrumskæld enda ekki á verksviði nefndarinnar.


Frásögn af forvitnilegri umfjöllun af opinni samskiptasíðu eins og Facebook verður því að teljast eiga erindi í fjölmiðil og þeir sem eru þar til umfjöllunar mega búast við að mál séu tekin upp í víðara samhengi af öðrum fjölmiðlum.


**Úrskurður:**


Kærði hefur ekki brotið gegn siðareglum.

  
Björn V. Sigurpálsson

  
Hjörtur Gíslason

  
Friðrik Þór Guðmundsson

  
Asgeir Þór Arnason

  
Jóhannes Tómasson